

I. DISPOSICIÓN XERAIS

XEFATURA DO ESTADO

13248 *Real decreto lei 15/2014, do 19 de decembro, de modificación do réxime económico e fiscal de Canarias.*

EXPOSICIÓN DE MOTIVOS

I

A Lei 19/1994, do 6 de xullo, de modificación do réxime económico e fiscal de Canarias, contén no seu articulado a regulación de diversos incentivos fiscais, aplicables tanto á imposición directa como á indirecta. De acordo co dereito comunitario, algunhas destas previsións teñen a consideración de axudas de Estado, o que comporta que a súa aplicación no ordenamento interno se deba adecuar á normativa comunitaria.

Nese contexto, xa que a vixencia dos ditos incentivos alcanzaba ata o 31 de decembro de 2013, en correspondencia coa do mapa de axudas estatais de finalidade rexional aprobado para España para o período 2007-2013, co número N 626/2006, con data 20 de decembro de 2006, e ante a demora na aprobación de directrices sobre as axudas de Estado de finalidade rexional para 2014-2020 e do Regulamento (UE) nº 651/2014 da Comisión, do 17 de xuño de 2014, polo que se declaran determinadas categorías de axudas compatibles co mercado interior en aplicación dos artigos 107 e 108 do Tratado, comunmente coñecido como o Regulamento xeral de exención por categorías, o Reino de España procedeu a solicitar a prórroga para o exercicio 2014 de tales incentivos, prórroga que foi outorgada mediante Decisión da Comisión do 17 de decembro de 2013.

Como está próxima a finalización do dito prazo adicional, procede incorporar ao dereito interno as modificacións que derivan da negociación levada a cabo coas autoridades comunitarias, incorporación que, como consecuencia da nova orientación adoptada polas ditas autoridades en materia de axudas de Estado, experimentou un cambio substancial tendo en conta que se abandona o sistema de notificación e posterior autorización, que foi substituído por un mecanismo de adecuación do global dos incentivos integrados no réxime económico e fiscal de Canarias ao aludido regulamento.

Este real decreto lei estrutúrase nun artigo único, que incorpora diversas modificacións que inciden, fundamentalmente, na regulación da Reserva para Investimentos en Canarias e da Zona Especial Canaria, ao tempo que se introduce unha dedución por investimentos en territorios de África occidental e por gastos de propaganda e publicidade, en catro disposicións adicionais, unha disposición transitoria, e catro disposicións derradeiras.

Polo que concirne á Reserva para Investimentos en Canarias, merece destacarse, en primeiro lugar, a nova posibilidade de materialización daquela na creación de postos de traballo que non poida ser cualificada como investimento inicial, opción que comporta o cumprimento dos mesmos requisitos previstos para a materialización de emprego relacionado con investimentos iniciais, isto é, o incremento do cadro de persoal medio total en 12 meses e o seu mantemento durante un determinado tempo, e, adicionalmente, que, como límite a esta nova forma de materialización, se poderá destinar o 50 por cento das dotacións efectuadas a ela polo contribuínte, e que, como máximo, se poderá considerar, como tal materialización, o custo medio anual por traballador, por un importe de 36.000 euros.

A este cambio engádense outros, tales como a posibilidade de materializar a reserva en calquera tipo de instrumento financeiro, non só en accións, como ata agora, sempre que, de non se tratar destas últimas, fosen emitidos por entidades financeiras, ou a supresión das limitacións existentes para permitir que a dita reserva se poida materializar na subscripción de accións ou participacións emitidas polas entidades da Zona Especial

Canaria. Igualmente procede salientar a desaparición da obriga de presentación dun plan de investimentos como requisito para a materialización da devandita reserva, o que comportará a supresión dos custos que se xeraban con ocasión da súa elaboración e presentación.

Coa introdución da dita nova dedución perséguese incrementar os investimentos en Canarias dirixidos a facilitar e promover a utilización do arquipélago como plataforma privilexiada para a realización daqueles en países de África occidental.

Pola súa parte, a regulación da Zona Especial Canaria é obxecto de varias modificacións relevantes co fin de impulsar o logro dos seus obxectivos primordiais: o desenvolvemento económico e social e a diversificación da economía das illas Canarias nas mellores condicións posibles. Así, merecen unha mención específica a xeneralización do seu ámbito territorial a todo o arquipélago, ata a data só admitido para as actividades de servizos, de maneira que desaparece a limitación existente de delimitar as actividades vinculadas coa produción, transformación, manipulación ou comercialización de mercadorías a certas áreas xeográficas, a ampliación do seu ámbito subxectivo, ao estenderse ás sucursais, un aumento notable dos límites de base impositiva, vinculados á creación de emprego, para aplicar o tipo especial de gravame no imposto sobre sociedades, a incorporación de novas actividades permitidas, que se engaden ás xa existentes, que se manteñen, ou a supresión da restrición da aplicación da dedución por dobre imposición interna de dividendos correspondentes a participacións en entidades da Zona Especial Canaria procedentes de beneficios que tributasen no citado imposto ao tipo reducido do 4 por cento.

Ademais, amplíase o seu prazo de vixencia e mantense o esquema de horizonte temporal en que se vén desenvolvendo este réxime, cun período de inscrición no Rexistro Oficial de Entidades da Zona Especial Canaria, que nesta ocasión finalizará en 2020, e un segundo, de disfrute do réxime por aqueles beneficiarios matriculados naquel, que se estenderá ata 2026.

As modificacións que derivan do novo marco regulatorio comunitario en materia de axudas estatais complétanse con outras que obedecen á experiencia acumulada durante os anos de funcionamento do réxime económico e fiscal de Canarias, tendentes a posibilitar un maior grao de cumprimento dos obxectivos deste.

Adicionalmente, establécese unha porcentaxe incrementada aplicable á dedución por actividades de innovación tecnolóxica que se realicen en Canarias, fíxanse uns límites superiores aos xerais en relación coas deducións por investimentos en producións cinematográficas, series audiovisuais e espectáculos en vivo de artes escénicas e musicais realizados no arquipélago, e amplíase o prazo de aplicación das cantidades non deducidas pola dedución por investimentos en Canarias.

II

O novo enfoque dado polas autoridades comunitarias no marco das axudas estatais, basicamente mediante a aplicación con carácter xeral do aludido Regulamento (UE) nº 651/2014 da Comisión, en detrimento do esquema de notificacións e autorizacións seguido ata agora, comporta unha serie de consecuencias relevantes na regulación que se debe fixar dos incentivos fiscais aplicables no marco do réxime económico e fiscal de Canarias para o período 2015-2020.

En primeiro termo, porque o mencionado regulamento se configura como a norma cuxa observancia devén esencial á hora de establecer a nova regulación, cunha concepción global do dito réxime, de maneira que determinados límites que naquel se conteñen deberán ser cumpridos polos beneficiarios das axudas, consideradas estas no seu conxunto, con independencia de cal sexa a súa natureza, tributaria ou non.

En segundo lugar, porque, ao prescindirse da outrora preceptiva autorización, a Comisión Europea require que o cumprimento de tales incentivos sexa garantido suficientemente polo Reino de España mediante a implantación na súa normativa interna de mecanismos de control adecuados.

Para tal fin, este real decreto lei recolle nas súas disposicións adicionais eses e outros compromisos que derivan do ordenamento comunitario.

En particular, resulta oportuno aludir á segunda das ditas disposicións, a cal recolle expresamente a mención á observancia do mencionado regulamento, ao tempo que incorpora os límites específicos que se deberán observar para a aplicación do conxunto de axudas rexionais ao funcionamento, en función do tipo de actividade que se desenvolva, así como á disposición adicional cuarta, na cal queda plasmado o antes aludido mecanismo de control, que se configura sobre a base dunha declaración informativa relativa ás distintas medidas ou réximes de axudas utilizadas que deberán presentar os beneficiarios destas, control que se completa co establecemento dunha infracción, constituída pola superación dos límites de acumulación de axudas, que comportará unha sanción, consistente nunha multa pecuniaria proporcional respecto do exceso.

O real decreto lei complétase cunha disposición transitoria, referida á Reserva para Investimentos en Canarias, e catro disposicións derradeiras concernentes, por esta orde, a unha modificación que se introduce na Lei 24/2013, do 26 de decembro, do sector eléctrico, ao título competencial, á habilitación normativa e á entrada en vigor da norma.

III

A Lei 24/2013, do 26 de decembro, do sector eléctrico, recolle a posibilidade de exceptuar do procedemento de concorrencia competitiva para o outorgamento de réxime retributivo específico determinadas tecnoloxías de xeración renovable nos sistemas eléctricos non peninsulares cando a súa introdución supoña unha redución significativa dos custos de xeración do sistema eléctrico, e establece un calendario para elas e a súa convocatoria antes do 31 de decembro de 2014.

Esta disposición foi desenvolvida no Real decreto 413/2014, do 6 de xuño, polo que se regula a actividade de produción de enerxía eléctrica a partir de fontes de enerxía renovables, coxeración e residuos, e na Orde IET/1459/2014, do 1 de agosto, pola que se aproban os parámetros retributivos e se establece o mecanismo de asignación do réxime retributivo específico para novas instalacións eólicas e fotovoltaicas nos sistemas eléctricos dos territorios non peninsulares. Nestas establecíase unha convocatoria específica para eólica no sistema eléctrico canario, co obxecto de acelerar a posta en funcionamento destas instalacións e posibilitar a redución dos custos de xeración no prazo máis breve posible.

Non obstante o anterior, a esta convocatoria presentáronse proxectos eólicos por unha reducida potencia ao existiren atrasos na tramitación administrativa de moitas instalacións, polo que o mantemento do calendario previsto na lei dificultaría o obxectivo pretendido dun despregamento masivo desta tecnoloxía e, como consecuencia diso, a esperada redución significativa dos custos de xeración nestes sistemas.

Por iso, procédese á modificación do calendario previsto na lei, o que se leva a cabo con carácter de urxencia, posto que a data límite para o establecemento de novas convocatorias finaliza o vindeiro 31 de decembro de 2014.

IV

Á vista das modificacións recollidas neste real decreto lei, derivadas basicamente da nova regulación comunitaria en materia de axudas estatais, e dada a expiración da vixente regulación dos incentivos fiscais contidos no réxime económico e fiscal de Canarias ao final deste exercicio, é de vital importancia que o escenario regulador descrito entre en vigor antes de que se inicie o ano 2015, para que os axentes económicos poidan coñecer o marco xurídico-tributario aplicable ás actividades e aos investimentos producidos en Canarias e planificar as súas decisións tendo en conta o novo contexto fiscal que estará en vigor a partir da dita data.

As circunstancias descritas xustifican sobradamente o recurso á figura xurídica do real decreto lei, ao concorrer o suposto habilitante da extraordinaria e urxente necesidade que a nosa Constitución exige para a súa utilización.

Dado que o contido deste real decreto lei supón a modificación do réxime económico e fiscal de Canarias, solicitouse ao Parlamento de Canarias o preceptivo informe exixido pola disposición adicional terceira da Constitución e polo artigo 46, número 3, do Estatuto de autonomía de Canarias, aprobado pola Lei orgánica 10/1982, do 10 de agosto.

Na súa virtude, facendo uso da autorización contida no artigo 86.1 da Constitución española, por proposta do ministro de Facenda e Administracións Públicas, logo de deliberación do Consello de Ministros na súa reunión do día 19 de decembro de 2014,

DISPOÑO:

Artigo único. *Modificación da Lei 19/1994, do 6 de xullo, de modificación do réxime económico e fiscal de Canarias.*

Con efectos para os períodos impositivos que se inicien a partir do 1 de xaneiro de 2015, introdúcese as seguintes modificacións na Lei 19/1994, do 6 de xullo, de modificación do réxime económico e fiscal de Canarias:

Un. Modifícanse os números 2, 4, 5, 6, 8, 11, 13, 16 e 17 do artigo 27, e derrógase o número 10; aqueles quedan redactados da seguinte maneira:

«2. A redución a que se refire o punto anterior aplicarase ás dotacións que en cada período impositivo se fagan á Reserva para Investimentos ata o límite do noventa por cento da parte de beneficio obtido no mesmo período que non sexa obxecto de distribución, en canto proceda de establecementos situados en Canarias.

En ningún caso a aplicación da redución poderá determinar que a base imponible sexa negativa.

Para estes efectos, consideraranse beneficios procedentes de establecementos en Canarias os derivados de actividades económicas, incluídos os procedentes da transmisión dos elementos patrimoniais afectos a elas, así como os derivados da transmisión de elementos patrimoniais non afectos a actividades económicas, nos termos que regulamentariamente se determinen.

Para estes efectos, consideraranse beneficios non distribuídos os destinados a nutrir as reservas, excluída a de carácter legal. Non terá a consideración de beneficio non distribuído o que derive da transmisión de elementos patrimoniais cuxa adquisición determinase a materialización da Reserva para Investimentos regulada neste artigo.

As asignacións a reservas consideraranse diminuídas no importe que eventualmente se detraese dos fondos propios, quer no exercicio a que a redución da base imponible se refire, quer no que se adoptase o acordo de realizar as mencionadas asignacións.»

«4. As cantidades destinadas á Reserva para Investimentos en Canarias deberanse materializar no prazo máximo de tres anos, contados desde a data do devindicación do imposto correspondente ao exercicio en que se dotou esta, na realización dalgún dos seguintes investimentos:

A. Os investimentos iniciais consistentes na adquisición de elementos patrimoniais novos do inmovilizado material ou intanxible como consecuencia:

Da creación dun establecemento.

Da ampliación dun establecemento.

Da diversificación da actividade dun establecemento para a elaboración de novos produtos.

Da transformación substancial no proceso de produción dun establecemento.

Tamén terán a consideración de iniciais os investimentos en solo, edificado ou non, sempre que non se beneficiasen anteriormente do réxime previsto neste artigo e se afecte:

Á promoción de vivendas protexidas, cando proceda esta cualificación de acordo co previsto no Decreto 27/2006, do 7 de marzo, polo que se regulan as actuacións do Plan de vivenda de Canarias, e sexan destinadas ao arrendamento pola sociedade promotora.

Ao desenvolvemento de actividades industriais incluídas nas divisións 1 a 4 da sección primeira das tarifas do imposto sobre actividades económicas, aprobadas polo Real decreto legislativo 1175/1990, do 28 de setembro, polo que se aproban as tarifas e a instrución do imposto sobre actividades económicas.

Ás zonas comerciais que sexan obxecto dun proceso de rehabilitación.

Ás actividades turísticas reguladas na Lei 7/1995, do 6 de abril, de ordenación do turismo de Canarias, cuxa adquisición teña por obxecto a rehabilitación dun establecemento turístico.

Só para os efectos de entender incluído no importe da materialización da reserva o valor correspondente ao solo, consideraranse obras de rehabilitación as actuacións dirixidas á renovación, ampliación ou mellora de establecementos turísticos, sempre que reúnan as condicións necesarias para seren incorporadas ao inmovilizado material como maior valor do inmovible.

En caso de inmovilizado intanxible, deberase tratar de dereitos de uso de propiedade industrial ou intelectual, coñecementos non patentados, nos termos que regulamentariamente se determinen, e de concesións administrativas, e reunir os seguintes requisitos:

Utilizarse exclusivamente no establecemento que reúna as condicións indicadas nesta epígrafe.

Ser amortizable.

Ser adquirido a terceiros en condicións de mercado. No caso das concesións administrativas, entenderase que son adquiridas en condicións de mercado cando sexan obxecto dun procedemento de concorrencia competitiva.

Figurar no activo da empresa.

Tratándose de contribuíntes que cumpran as condicións do artigo 101 da Lei 27/2014, do 27 de novembro, do imposto sobre sociedades, no período impositivo en que se obtén o beneficio con cargo ao cal se dota a reserva, o investimento poderá consistir na adquisición de elementos usados do inmovilizado, sempre que os bens adquiridos non se beneficiasen anteriormente do réxime previsto neste artigo. Tratándose de solo, deberanse cumprir en todo caso as condicións previstas nesta epígrafe.

Reglamentariamente, determinaranse os termos en que se entenda que se produce a creación ou ampliación dun establecemento e a diversificación e a transformación substancial da súa produción.

B. A creación de postos de traballo relacionada de forma directa cos investimentos previstos na epígrafe A, que se produza dentro dun período de seis meses contados desde a data de entrada en funcionamento do dito investimento.

A creación de postos de traballo determinarase polo incremento do cadro de persoal medio total do contribuínte producido no dito período respecto do cadro de persoal medio dos 12 meses anteriores á data da entrada en funcionamento do investimento, sempre que o dito incremento se manteña durante un período de cinco anos, salvo no caso de contribuíntes que cumpran as condicións do artigo 101 da Lei 27/2014, do 27 de novembro, do imposto sobre sociedades, no período impositivo en que se obtén o beneficio con cargo ao cal se dota a reserva, os cales deberán manter o dito incremento durante tres anos.

Para o cálculo do cadro de persoal medio total da empresa e do seu incremento, tomaranse as persoas empregadas, nos termos que dispoña a lexislación laboral, tendo en conta a xornada contratada en relación coa xornada completa.

B bis. A creación de postos de traballo efectuada no período impositivo que non poida ser considerada como investimento inicial por non reunir algún dos requisitos establecidos na epígrafe B anterior, co límite do 50 por cento das dotacións á reserva efectuadas polo contribuínte no período impositivo.

C. A adquisición de elementos patrimoniais do inmovilizado material ou intanxible que non poida ser considerada como investimento inicial por non reunir algunha das condicións establecidas na epígrafe A anterior, o investimento en elementos patrimoniais que contribúan á mellora e protección do ambiente no territorio canario, así como aqueles gastos de investigación e desenvolvemento que regulamentariamente se determinen.

Tratándose de vehículos de transporte de pasaxeiros por vía marítima ou por estrada, deberanse dedicar exclusivamente a servizos públicos no ámbito de funcións de interese xeral que se correspondan coas necesidades públicas das illas Canarias.

Tratándose de solo, edificado ou non, este débese afectar:

Á promoción de vivendas protexidas, cando proceda esta cualificación de acordo co previsto no Decreto 27/2006, do 7 de marzo, polo que se regulan as actuacións do Plan de vivenda de Canarias, destinadas ao arrendamento pola sociedade promotora.

Ao desenvolvemento de actividades industriais incluídas nas divisións 1 a 4 da sección primeira das tarifas do imposto sobre actividades económicas, aprobadas polo Real decreto legislativo 1175/1990, do 28 de setembro, polo que se aproban as tarifas e a instrución do imposto sobre actividades económicas.

Ás zonas comerciais que sexan obxecto dun proceso de rehabilitación.

Ás actividades turísticas reguladas na Lei 7/1995, do 6 de abril, de ordenación do turismo de Canarias, cuxa adquisición teña por obxecto a rehabilitación dun establecemento turístico.

Só para os efectos de entender incluído no importe da materialización da reserva o valor correspondente ao solo, consideraranse obras de rehabilitación as actuacións dirixidas á renovación, ampliación ou mellora de establecementos turísticos, sempre que reúnan as condicións necesarias para seren incorporadas ao inmovilizado material como maior valor do inmovible.

D. A subscrición de:

1.º Accións ou participacións no capital emitidas por sociedades como consecuencia da súa constitución ou ampliación de capital que desenvolvan no arquipélago a súa actividade, sempre que se cumpran os seguintes requisitos:

Estas sociedades realizarán os investimentos previstos nas epígrafes A, B, B bis e C anteriores, nas condicións reguladas neste artigo, sen prexuízo do establecido no segundo parágrafo do número 1 deste artigo. Sempre que tanto a entidade subscriptora do capital como a que efectúa o investimento cumpran as condicións do artigo 101 da Lei 27/2014, do 27 de novembro, do imposto sobre sociedades, no período impositivo en que se obtén o beneficio con cargo ao cal se dota a reserva, será posible efectuar os investimentos das citadas epígrafes A, B, B bis e C nos termos e nas condicións previstos para este tipo de contribuíntes.

Estas sociedades deberán efectuar estes investimentos no prazo de tres anos contados desde a data da devindicación do imposto correspondente ao exercicio en que o contribuínte que adquire as accións ou as participacións no seu capital dotase a reserva regulada neste artigo.

Os elementos patrimoniais así adquiridos deberanse manter en funcionamento en Canarias nos termos previstos neste artigo.

O importe do valor de adquisición dos investimentos realizados pola sociedade participada deberá alcanzar, como mínimo, o importe desembolsado das accións ou participacións adquiridas polo contribuínte.

Os investimentos realizados pola sociedade participada non darán lugar á aplicación de ningún outro beneficio fiscal, salvo os previstos no artigo 25 desta lei.

Para estes efectos, a entidade subscriptora do capital procederá a comunicar fidedignamente á sociedade emisora o valor nominal das accións ou participacións adquiridas, así como a data en que remata o prazo para a materialización do seu investimento. A sociedade emisora comunicará fidedignamente á entidade subscriptora do seu capital os investimentos efectuados con cargo ás súas accións ou participacións cuxa subscripción supuxese a materialización da reserva, así como a súa data. Os investimentos realizados entenderanse financiados cos fondos derivados das accións ou participacións emitidas segundo a orde en que se producise o seu desembolso efectivo. No caso de desembolsos efectuados na mesma data, considerarase que contribúen de forma proporcional ao financiamento do investimento.

2.º Accións ou participacións no capital emitidas por entidades da Zona Especial Canaria como consecuencia da súa constitución ou ampliación de capital, sempre que se cumpra cos requisitos e as condicións establecidos no número 1.º anterior desta epígrafe D e os previstos no capítulo I do título V desta lei. Adicionalmente, deberán reunirse as seguintes condicións:

O importe da emisión ou ampliación de capital destinada á materialización da reserva non se poderá aplicar, en ningún caso, ao cumprimento dos requisitos de investimento mínimo das entidades da Zona Especial Canaria regulados no artigo 31 desta lei.

A persoa ou entidade que subscriba as accións ou participacións emitidas non poderá transmitir ou ceder o uso a terceiros dos elementos patrimoniais afectos á súa actividade económica, existentes no exercicio anterior á subscripción, no dito exercicio ou nos catro exercicios posteriores, salvo que rematasen a súa vida útil e se proceda á súa substitución ou que se trate de operacións realizadas no curso normal da súa actividade por contribuíntes que se dediquen, a través dunha explotación económica, ao arrendamento ou cesión a terceiros para o seu uso de elementos patrimoniais do inmovilizado, sempre que non exista vinculación, directa ou indirecta, cos arrendatarios ou cesionarios dos ditos bens, nos termos definidos no número 2 do artigo 18 da Lei 27/2014, do 27 de novembro, do imposto sobre sociedades, nin se trate de operacións de arrendamento financeiro. En ningún caso poderá transmitilos ou ceder o seu uso á entidade da Zona Especial Canaria cuxas accións subscriba nin a outra persoa vinculada con esta última nos termos anteriormente indicados.

A persoa ou entidade que subscriba as accións ou participacións emitidas non procederá á redución do seu cadro de persoal medio total, existente no exercicio anterior á subscripción, nos catro exercicios posteriores. Para o cálculo do cadro de persoal medio total da empresa tomaranse as persoas empregadas, nos termos que dispoña a lexislación laboral, tendo en conta a xornada contratada en relación coa xornada completa.

3.º Calquera instrumento financeiro emitido por entidades financeiras sempre que os fondos captados co obxecto de materializar a reserva sexan destinados ao financiamento en Canarias de proxectos privados, cuxos investimentos sexan aptos de acordo co regulado neste artigo, sempre que as emisións estean supervisadas polo Goberno de Canarias e contén cun informe vinculante da Axencia Estatal de Administración Tributaria, nos termos que regulamentariamente se establezan.

Para estes efectos, o contribuínte que materializa a reserva procederá a comunicar fidedignamente á entidade financeira o seu importe, así como a data en que remata o prazo para a materialización. Esta última, pola súa vez, comunicalle fidedignamente ao contribuínte os investimentos efectuados, así como a súa data. Os investimentos realizados entenderanse financiados segundo a orde en que se producise o desembolso efectivo. No caso de desembolsos efectuados na mesma data, considerarase que contribúen de forma proporcional ao financiamento do investimento.

Os investimentos realizados non darán lugar á aplicación de ningún outro beneficio fiscal, salvo os previstos no artigo 25 desta lei.

4.º Títulos valores de débeda pública da Comunidade Autónoma de Canarias, das corporacións locais canarias ou das súas empresas públicas ou organismos autónomos, sempre que esta se destine a financiar investimentos en infraestrutura e equipamento ou de mellora e protección do ambiente no territorio canario, co límite do cincuenta por cento das dotacións efectuadas en cada exercicio.

Para estes efectos, o Goberno da Nación aprobará a contía e o destino das emisións, a partir das propostas que en tal sentido lle formule a Comunidade Autónoma de Canarias, logo de informe do Comité de Investimentos Públicos.

5.º Títulos valores emitidos por organismos públicos que procedan á construción ou explotación de infraestruturas ou equipamentos de interese público para as administracións públicas en Canarias, cando o financiamento obtido coa dita emisión se destine de forma exclusiva a tal construción ou explotación, co límite do cincuenta por cento das dotacións efectuadas en cada exercicio.

Para estes efectos, o Goberno da Nación aprobará a contía e o destino das emisións, a partir das propostas que en tal sentido lle formule a Comunidade Autónoma de Canarias, logo de informe do Comité de Investimentos Públicos.

6.º Títulos valores emitidos por entidades que procedan á construción ou explotación de infraestruturas ou equipamentos de interese público para as administracións públicas en Canarias, unha vez obtida a correspondente concesión administrativa ou título administrativo habilitante, cando o financiamento obtido coa dita emisión se destine de forma exclusiva a tal construción ou explotación, co límite do cincuenta por cento das dotacións efectuadas en cada exercicio e nos termos que se prevexan regulamentariamente. A emisión dos correspondentes títulos valores estará suxeita a autorización administrativa previa por parte da Administración competente para o outorgamento do correspondente título administrativo habilitante.

Para estes efectos, e cando se trate de entidades do sector público, o Goberno da Nación aprobará a contía e o destino das emisións, a partir das propostas que en tal sentido lle formule, de ser o caso, a Comunidade Autónoma de Canarias, logo de informe do Comité de Investimentos Públicos.

5. Os elementos patrimoniais en que se materialice o investimento deberán estar situados ou ser recibidos no arquipélago canario, utilizados nel, afectos e necesarios para o desenvolvemento de actividades económicas do contribuínte, salvo no caso dos que contribúan á mellora e protección do ambiente no territorio canario.

Para tal efecto, entenderanse situados e utilizados no arquipélago:

As aeronaves que, polo seu destino, contribúan a mellorar as conexións das illas Canarias, nos termos que regulamentariamente se determinen.

Os buques con pavillón español e con porto base en Canarias, incluídos os inscritos no Rexistro Especial de Buques e Empresas Navieiras.

As redes de transporte e de comunicacións que conecten o arquipélago canario co exterior, polo tramo desta que se encontre dentro do territorio das illas Canarias e a parte situada fóra del que se utilice para conectar entre si as distintas illas do arquipélago.

As aplicacións informáticas e os dereitos de propiedade industrial, que non sexan simples signos distintivos do contribuínte ou dos seus produtos, e que se vaian aplicar exclusivamente en procesos produtivos ou actividades comerciais que se desenvolvan no ámbito territorial canario, así como os dereitos de propiedade intelectual que sexan obxecto de reprodución e distribución exclusivamente no arquipélago canario.

As concesións administrativas de uso de bens de dominio público radicados en Canarias.

As concesións administrativas de prestación de servizos públicos que se desenvolvan exclusivamente no arquipélago.

As concesións administrativas de obra pública para a execución ou explotación de infraestruturas públicas radicadas en Canarias.

6. Entenderase que o importe da materialización alcanzará o prezo de adquisición ou custo de produción dos elementos patrimoniais, con exclusión dos xuros, impostos estatais indirectos e as súas recargas, sen que poida resultar superior ao seu valor de mercado.

No caso de redes de transporte e comunicacións que conecten o arquipélago canario co exterior, o importe da materialización alcanzará o valor de adquisición ou custo de produción do tramo desta que se encontre dentro do territorio das illas Canarias e a parte situada fóra del que se utilice para conectar entre si as distintas illas do arquipélago.

No caso dos investimentos previstos na epígrafe A do número 4 deste artigo, o importe da materialización da reserva en elementos patrimoniais do inmovilizado intanxible non poderá exceder o cincuenta por cento do valor total do proxecto de investimento de que formen parte, salvo que se trate de contribuíntes que cumpran as condicións do artigo 101 da Lei 27/2014, do 27 de novembro, do imposto sobre sociedades, no período impositivo en que se obtén o beneficio con cargo ao cal se dota a reserva.

Computarase o cincuenta por cento do importe dos custos de estudos preparatorios e de consultoría, cando estean directamente relacionados cos investimentos previstos na epígrafe A do número 4 deste artigo e se trate de contribuíntes que cumpran as condicións do artigo 101 da Lei 27/2014, do 7 de novembro, do imposto sobre sociedades, no período impositivo en que se obtén o beneficio con cargo ao cal se dota a reserva.

Nos casos de creación de postos de traballo, considerarase producida a materialización unicamente durante os dous primeiros anos desde que se produce o incremento de cadro de persoal e computarase, en cada período impositivo, polo importe do custo medio dos salarios brutos e as cotizacións sociais obrigatorias que se correspondan co dito incremento. No suposto previsto na epígrafe B bis do número 4 deste artigo, entenderase por materialización da reserva o custo medio referido ata un máximo de 36.000 euros por traballador.

O importe da materialización da reserva en gastos de investigación e desenvolvemento tamén alcanzará os proxectos contratados con universidades, organismos públicos de investigación ou centros de innovación e tecnoloxía, oficialmente recoñecidos e rexistrados e situados en Canarias.

No caso dos instrumentos financeiros a que se refire a epígrafe D do número 4 deste artigo, considerarase producida a materialización no importe desembolsado con ocasión da súa subscripción. No caso de accións ou participacións, tamén terá esta consideración o importe desembolsado en concepto de prima de emisión.

A parte do investimento financiado con subvencións non se considerará como importe de materialización da reserva.»

«8. Os elementos patrimoniais en que se materializase a Reserva para Investimentos a que se refiren as epígrafes A e C do número 4, así como os adquiridos en virtude do disposto na epígrafe D dese mesmo punto, deberán

permanecer en funcionamento na empresa do adquirente durante cinco anos, como mínimo, sen ser obxecto de transmisión, arrendamento ou cesión a terceiros para o seu uso. Cando a súa vida útil sexa inferior ao dito período, non se considerará incumplido este requisito cando se proceda á adquisición doutro elemento patrimonial que o substitúa polo seu valor neto contable, no prazo de seis meses desde a súa baixa no balance que reúna os requisitos exixidos para a aplicación da redución prevista neste artigo e que permaneza en funcionamento durante o tempo necesario para completar o dito período. Non se poderá entender que esta nova adquisición supón a materialización das cantidades destinadas á Reserva para Investimentos en Canarias, salvo polo importe desta que excede o valor neto contable do elemento patrimonial que se substitúe e que tivo a consideración de materialización da reserva regulada neste artigo. No caso da adquisición de solo, o prazo será de dez anos.

Nos casos de perda do elemento patrimonial, deberase proceder á súa substitución nos termos previstos no parágrafo anterior.

Os contribuíntes que se dediquen á actividade económica de arrendamento ou cesión a terceiros para o seu uso de elementos patrimoniais do inmovilizado poderán desfrutar do réxime da Reserva para Investimentos, sempre que non exista vinculación, directa ou indirecta, cos arrendatarios ou cesionarios dos ditos bens, nos termos definidos no artigo 18, número 2, da Lei 27/2014, do 27 de novembro, do imposto sobre sociedades, nin se trate de operacións de arrendamento financeiro. Para estes efectos, entenderase que o arrendamento de inmoables se realiza como actividade económica unicamente cando concorran as circunstancias previstas no número 2 do artigo 27 da Lei 35/2006.

Nos supostos de arrendamento de bens inmoables, ademais das condicións previstas no parágrafo anterior, o contribuínte deberá ter a consideración de empresa turística de acordo co previsto na Lei 7/1995, do 6 de abril, de ordenación do turismo de Canarias, tratarse do arrendamento de vivendas protexidas pola sociedade promotora, de bens inmoables afectos ao desenvolvemento de actividades industriais incluídas nas divisións 1 a 4 da sección primeira das tarifas do imposto sobre actividades económicas, aprobadas polo Real decreto legislativo 1175/1990, do 28 de setembro, polo que se aproban as tarifas e a instrución do imposto sobre actividades económicas, ou de zonas comerciais situadas en áreas cuxa oferta turística se encontre en declive, porque precisa intervencións integradas de rehabilitación de áreas urbanas, segundo os termos en que se define nas directrices de ordenación xeral de Canarias, aprobadas pola Lei 19/2003, do 14 de abril.

Cando se trate dos valores a que se refire a epígrafe D do número 4, deberán permanecer no patrimonio do contribuínte durante cinco anos ininterrompidos, sen que os dereitos de uso ou desfrute asociados a eles poidan ser obxecto de cesión a terceiros.»

«11. Os contribuíntes a que se refire este artigo poderán levar a cabo investimentos anticipados, que se considerarán como materialización da Reserva para Investimentos que se dote con cargo a beneficios obtidos no período impositivo en que se realiza o investimento ou nos tres posteriores, sempre que se cumpran os restantes requisitos exixidos nel.

As citadas dotacións deberanse realizar con cargo a beneficios obtidos ata o 31 de decembro de 2020.

A materialización e o seu sistema de financiamento comunicaranse conxuntamente coa declaración do imposto sobre sociedades, o imposto sobre a renda de non residentes ou o imposto sobre a renda das persoas físicas do período impositivo en que se realicen os investimentos anticipados.»

«13. Mentres non se cumpra o prazo de mantemento a que se refire o número 8 deste artigo, os contribuíntes farán constar na memoria das contas anuais a seguinte información:

- a) O importe das dotacións efectuadas á reserva con indicación do exercicio en que se efectuaron.
- b) O importe da reserva pendente de materialización, con indicación do exercicio en que se dotase.
- c) O importe e a data dos investimentos, con indicación do exercicio en que se produciu a dotación da reserva, así como a identificación dos elementos patrimoniais en que se materializa.
- d) O importe e a data dos investimentos anticipados á dotación, previstos no número 11 deste artigo, o que se fará constar a partir da memoria correspondente ao exercicio en que estes se materializaron.
- e) O importe correspondente a calquera outro beneficio fiscal devindicado con ocasión de cada investimento realizado como consecuencia da materialización da reserva regulada neste artigo.
- f) O importe das subvencións solicitadas ou concedidas por calquera Administración pública con ocasión de cada investimento realizado como consecuencia da materialización da reserva regulada neste artigo.

Os contribuíntes que non teñan obriga de levar contas anuais levarán un libro rexistro de bens de investimento, no cal figurará a información requirida nas alíneas a) a e) anteriores.

En relación cos investimentos previstos nos ordinais 1.º, 2.º e 3.º da epígrafe D do número 4 deste artigo, a sociedade que realice calquera dos investimentos previstos nas súas epígrafes A e C, así como as entidades financeiras e sociedades xestoras de entidades de investimento colectivo de tipo pechado e sociedades xestoras de institucións de investimento colectivo, mentres non se cumpra o prazo de mantemento a que se refire o número 8 deste artigo, farán constar na memoria das contas anuais o importe e a data dos investimentos efectuados que supoñan a materialización da reserva prevista neste artigo dotada pola entidade subscriptora das súas accións ou participacións, así como os exercicios durante os cales esta se deba manter en funcionamento.»

«16. A disposición da Reserva para Investimentos con anterioridade á finalización do prazo de mantemento do investimento ou para investimentos diferentes aos previstos no número 4 deste artigo, así como o incumprimento de calquera outro dos requisitos establecidos neste artigo, salvo os contidos nos seus números 3 e 13, dará lugar a que o contribuínte proceda á integración, na base imposable do imposto sobre sociedades ou do imposto sobre a renda de non residentes ou na cota íntegra do imposto sobre a renda das persoas físicas do exercicio en que ocorresen estas circunstancias, das cantidades que no seu día deron lugar á redución daquela ou á dedución desta, sen prexuízo das sancións que resulten procedentes.

No caso do incumprimento da obriga do exercicio da opción de compra prevista nos contratos de arrendamento financeiro, a integración na base imposable terá lugar no exercicio en que contractualmente estivese previsto que esta se debería ter exercido.

Liquidaranse xuros de demora nos termos previstos na Lei 58/2003 e na súa normativa de desenvolvemento.

17. Constitúen infraccións tributarias graves os seguintes supostos:

- a) A falta de contabilización da Reserva para Investimentos nos termos previstos no número 3 deste artigo, que será sancionada con multa pecuniaria proporcional do 2 por cento da dotación que se debería ter efectuado.

b) Non facer constar na memoria das contas anuais a información a que se refire o número 13 deste artigo, que será sancionada con multa pecuniaria proporcional do 2 por cento do importe das dotacións á Reserva para Investimentos que se deberían ter incluído.

c) Incluír datos falsos, incompletos ou inexactos na memoria das contas anuais a que se refire o número 13 deste artigo, que será sancionada con multa pecuniaria fixa de 100 euros por cada dato omitido, falso ou inexacto, cun mínimo de 1.000 euros.

Constitúe infracción tributaria leve a falta de comunicación dos datos ou a comunicación de datos falsos, incompletos ou inexactos a que se refire a epígrafe D do número 4 deste artigo, que será sancionada con multa pecuniaria fixa de 100 euros por cada dato omitido, falso ou inexacto, cun mínimo de 500 euros.»

Dous. Engádesse o artigo 27 bis, que queda redactado da seguinte maneira:

«Artigo 27 bis. *Dedución por investimentos en territorios de África occidental e por gastos de propaganda e publicidade.*

1. As entidades suxeitas ao imposto sobre sociedades con domicilio fiscal en Canarias cuxo importe neto da cifra de negocios no período impositivo inmediato anterior sexa igual ou inferior a 10 millóns de euros e cun cadro de persoal medio no dito período inferior a 50 persoas, terán dereito a practicar as seguintes deducións da cota íntegra:

a) O 15 por cento dos investimentos que efectivamente se realicen na constitución de filiais ou establecementos permanentes no Reino de Marrocos, na República Islámica de Mauritania, na República de Senegal, na República de Gambia, na República de Guinea Bissau e na República de Cabo Verde, sempre que estas entidades realicen actividades económicas neses territorios no prazo dun ano desde o momento do investimento. A aplicación da dedución requirirá:

– Que a entidade por si soa ou conxuntamente con outras entidades con domicilio fiscal en Canarias teña unha porcentaxe de participación no capital ou nos fondos propios da filial de, polo menos, o 50 por cento, e

– Que o investimento na dita entidade participada ou establecemento permanente se manteña durante un prazo de, polo menos, tres anos.

b) O 15 por cento do importe satisfeito en concepto de gastos de propaganda e publicidade de proxección plurianual para lanzamento de produtos, de apertura e prospección de mercados no estranxeiro e de concorrencia a feiras, exposicións e manifestacións análogas, incluídas neste caso as celebradas en España con carácter internacional.

As ditas deducións serán do 10 por cento cando, aínda que non concorran os requisitos previstos no primeiro parágrafo deste número 1, o referido importe neto da cifra de negocios non exceda os 50 millóns de euros e o mencionado cadro de persoal medio sexa inferior a 250.

2. No suposto de entidades que formen parte dun grupo de sociedades no sentido do artigo 42 do Código de comercio, con independencia da residencia e da obriga de formular contas anuais consolidadas, o importe neto da cifra de negocios e o cadro de persoal medio referiranse ao conxunto de entidades pertencentes ao mesmo grupo.

Cando a entidade for de nova creación, o importe neto da cifra de negocios referirase ao primeiro período impositivo en que se desenvolva efectivamente a actividade. Se o período impositivo inmediato anterior tivese unha duración inferior

ao ano, ou a actividade se desenvolvese durante un prazo tamén inferior, o importe neto da cifra de negocios elevarase ao ano.

3. A dedución prevista na alínea a) do número 1 deste artigo aplicarase no período impositivo en que a entidade participada ou o establecemento permanente inicien a actividade económica, e estará condicionada a un incremento do cadro de persoal medio en Canarias do contribuínte nese período impositivo respecto do cadro de persoal medio existente no período impositivo anterior e ao mantemento do dito incremento durante un prazo de tres anos.

Esta dedución estará sometida aos límites establecidos no número 1 do artigo 39 da Lei 27/2014, do 27 de novembro, do imposto sobre sociedades.

4. A dedución prevista neste artigo, cos límites e condicións sinalados nel, resultará igualmente de aplicación a persoas físicas que realicen actividades económicas en Canarias.»

Tres. Modifícase o artigo 29, que queda redactado da seguinte maneira:

«Artigo 29. *Vixencia da Zona Especial Canaria.*

1. A vixencia da Zona Especial Canaria terá como límite o 31 de decembro do ano 2026, prorrogable logo de autorización da Comisión Europea.

2. Non obstante, a autorización da inscrición no Rexistro Oficial de Entidades da Zona Especial Canaria terá como límite o 31 de decembro do ano 2020.

3. O mantemento da Zona Especial Canaria estará condicionado en todo caso ao resultado das revisións periódicas que deba realizar a Comisión Europea.»

Catro. Modifícase o artigo 30, que queda redactado da seguinte maneira:

«Artigo 30. *Ámbito xeográfico de aplicación.*

O ámbito xeográfico da Zona Especial Canaria estenderase a todo o territorio das illas Canarias.»

Cinco. Modifícase o artigo 31, que queda redactado da seguinte maneira:

«Artigo 31. *Ámbito subxectivo de aplicación.*

1. Son entidades da Zona Especial Canaria as persoas xurídicas e sucursais de nova creación que, reunindo os requisitos enumerados no punto seguinte, sexan inscritas no Rexistro Oficial de Entidades da Zona Especial Canaria.

2. Soamente serán inscribíbles aquelas persoas xurídicas e sucursais que reúnan os seguintes requisitos:

a) Que teñan o seu domicilio social e a sede de dirección efectiva no ámbito xeográfico da Zona Especial Canaria.

b) Que polo menos un administrador ou, no caso das sucursais, un representante legal resida nas illas Canarias.

c) Constituír o seu obxecto social a realización no ámbito xeográfico da Zona Especial Canaria de actividades económicas incluídas no anexo desta lei. Así mesmo, mediante sucursal diferenciada, poderán realizar outras actividades ás cales non serán de aplicación os beneficios da Zona Especial Canaria; neste caso deberán levar contabilidade separada, de acordo co disposto no artigo 42.1.b). a'), b') e c').

d) Realizar investimentos nos dous primeiros anos desde a súa inscrición, que se materialicen na adquisición de elementos patrimoniais do inmovilizado material ou intanxible, de ser o caso, situados ou recibidos no ámbito xeográfico da

Zona Especial Canaria, utilizados nel, afectos e necesarios para o desenvolvemento das actividades económicas efectuadas polo contribuínte no dito ámbito xeográfico, por un importe mínimo de:

- Nas illas de Gran Canaria e Tenerife, 100.000 euros.
- Nas illas de El Hierro, Fuerteventura, La Gomera, Lanzarote e La Palma, 50.000 euros.

Non se computarán, para estes efectos, os elementos patrimoniais adquiridos mediante as operacións reguladas no capítulo VII do título VII da Lei 27/2014, do 27 de novembro, do imposto sobre sociedades.

Estes investimentos deberán cumprir as seguintes condicións:

a') Os elementos patrimoniais adquiridos deberán permanecer na entidade da Zona Especial Canaria durante todo o período de desfrute deste réxime, ou durante a súa vida útil se for inferior, sen ser obxecto de transmisión. Tampouco poderán ser obxecto de arrendamento ou cesión a terceiros para o seu uso, salvo que se trate do obxecto social ou actividade da entidade da Zona Especial Canaria, e sempre que non exista vinculación directa ou indirecta cos arrendatarios ou cesionarios dos ditos bens. Entenderase que non se incumpre o requisito de permanencia cando os bens sexan obxecto de transmisión e o importe se reinvesta en novos elementos do inmovilizado nas mesmas condicións dentro do prazo dun ano.

b') Tratándose de elementos usados, estes non se poderán ter aplicado anteriormente ao fin previsto nesta alínea d).

Con carácter excepcional poderase autorizar a inscrición ou a permanencia no réxime da Zona Especial Canaria de entidades que non cumpran o requisito de investimento establecido nesta alínea d), sempre que o número de postos de traballo que se van crear e a media anual de cadro de persoal superen o mínimo previsto na alínea e) deste punto.

e) A creación de postos de traballo no ámbito xeográfico da Zona Especial Canaria dentro dos seis meses seguintes á súa inscrición e o mantemento como mínimo nese número da media anual de cadro de persoal durante o período de desfrute deste réxime, cun mínimo de:

- Nas illas de Gran Canaria e Tenerife, 5 empregos.
- Nas illas de El Hierro, Fuerteventura, La Gomera, Lanzarote e La Palma, 3 empregos.

Cando se exercese anteriormente a mesma actividade baixo a mesma ou baixo outra titularidade, exixírase unha creación neta de, polo menos:

- Nas illas de Gran Canaria e Tenerife, 5 empregos.
- Nas illas de El Hierro, Fuerteventura, La Gomera, Lanzarote e La Palma, 3 empregos.

f) Presentar unha memoria descritiva das principais actividades económicas que se van desenvolver, que avale a súa solvencia, viabilidade, competitividade internacional e a súa contribución ao desenvolvemento económico e social das illas Canarias, cuxo contido será vinculante para a entidade, salvo variación desas actividades logo de autorización expresa do Consello Reitor.

3. As características e condicións do disposto no número 2 anterior poderanse determinar regulamentariamente.»

Seis. Modifícase o número 1 do artigo 33, que queda redactado da seguinte maneira:

«1. O Consorcio da Zona Especial Canaria rexerese polo ordenamento xurídico privado en todo o relativo ás súas relacións patrimoniais, así como aos contratos para a promoción no estranxeiro da Zona Especial Canaria, e axustarase no desempeño das súas funcións públicas e no resto da súa actividade contractual ao disposto na Lei 30/1992, do 26 de novembro, de réxime xurídico das administracións públicas e do procedemento administrativo común; no Real decreto legislativo 3/2011, do 14 de novembro, polo que se aproba o texto refundido da Lei de contratos do sector público, e demais leis que lle sexan de aplicación.»

Sete. Modifícase o número 1 do artigo 35, que queda redactado da seguinte maneira:

«1. Adscrita ao Consello Reitor da Zona Especial Canaria créase, como órgano colexiado, unha comisión técnica cuxa finalidade será a emisión de informes sobre as solicitudes de inscrición no Rexistro Oficial de Entidades da Zona Especial Canaria, logo de comprobación dos requisitos legais e regulamentarios para obter a inscrición, informes que serán vinculantes no relativo ás cuestións de solvencia, viabilidade e competitividade internacional, contidos na alínea f) do artigo 31.2 desta lei.»

Oito. Modifícase a alínea a) do artigo 38, que queda redactada da seguinte maneira:

«a) Tramitar e resolver as solicitudes de autorización das entidades que pretendan acollerse ao réxime especial da Zona Especial Canaria, así como autorizar, logo de informe da Comisión Técnica, a inscrición ou a permanencia da inscrición de entidades cando concorra o suposto a que se refire o último parágrafo da alínea d) do artigo 31.2 desta lei.»

Nove. Modifícase o número 1 do artigo 41, que queda redactado da seguinte maneira:

«1. A inscrición dunha entidade no Rexistro Oficial de Entidades da Zona Especial Canaria estará condicionada á autorización previa do Consorcio da Zona Especial Canaria.

Para estes efectos, deberase presentar unha solicitude á cal se xuntará a memoria a que se refire a alínea f) do número 2 do artigo 31 desta lei. Xunto con esta solicitude achegarase un depósito ou aval por importe da taxa de inscrición regulada no artigo 50 desta lei.

Á vista da documentación presentada, o Consello Reitor procederá á autorización, logo de informe favorable da Comisión Técnica.

A autorización por parte do Consello Reitor deberase outorgar, de forma expresa, no prazo de dous meses, contados desde a data de recepción da solicitude no Consorcio da Zona Especial Canaria. Este prazo poderase suspender nos casos previstos no artigo 42.5 da Lei 30/1992, do 26 de novembro, de réxime xurídico das administracións públicas e do procedemento administrativo común. Non obstante, o prazo previsto na súa alínea c) quedará reducido a un mes. Transcorrido o prazo indicado sen resolución expresa, entenderase desestimada a solicitude de autorización.»

Dez. Modifícase a alínea b) do número 1 do artigo 42, que queda redactada da seguinte maneira:

«b) As entidades da Zona Especial Canaria levarán a súa contabilidade de acordo co disposto no Código de comercio e demais normativa contable que lles sexa de aplicación, sen prexuízo das seguintes especialidades:

a') Deberán individualizar en contas separadas as operacións indicadas nos números 1 e 2 do artigo 44 desta lei.

b') As sucursais a que se refire a alínea c) do número 2 do artigo 31 desta lei deberán levar contabilidade separada da contabilidade da entidade da Zona Especial Canaria.

c') Deberase incluír na memoria unha desagregación da parte da conta de perdas e ganancias, así como de todas aquelas contas que reflicten aplicación do beneficio, que proceda das operacións realizadas efectiva e materialmente no ámbito xeográfico da Zona Especial Canaria, determinada por aplicación a elas da porcentaxe obtida segundo se establece no artigo 44 desta lei.»

Once. Modifícase o artigo 44, que queda redactado da seguinte maneira:

«Artigo 44. *Imposto sobre sociedades. Determinación da parte de base imponible correspondente a operacións realizadas efectiva e materialmente no ámbito xeográfico da Zona Especial Canaria.*

Para determinar a parte da base imponible da entidade da Zona Especial Canaria que, para efectos da aplicación do tipo especial de gravame, derive das operacións realizadas material e efectivamente no ámbito xeográfico da Zona Especial Canaria, aplicarase sobre a base imponible da entidade a porcentaxe resultante de multiplicar por cen o resultado dunha fracción na cal figuren:

1. No numerador, con signo positivo, o importe das seguintes operacións:

a) As transmisións de bens mobles corporais efectuadas no ámbito xeográfico da Zona Especial Canaria.

Consideraranse efectuadas no ámbito xeográfico da Zona Especial Canaria as transmisións de bens corporais cando a posta á disposición do adquirente se realice no dito ámbito ou se inicie desde el a expedición ou transporte necesario para a dita posta á disposición.

Se os bens teñen que ser obxecto de instalación ou montaxe fóra do ámbito xeográfico da Zona Especial Canaria, incluírase o valor dos traballos de preparación e fabricación que se efectúen no dito ámbito e o das prestacións de servizos que completen a entrega ou instalación, sempre que se efectúen cos medios afectos á entidade da Zona Especial Canaria radicados ou adscritos ao seu ámbito xeográfico.

b) As transmisións de bens inmobles que formen parte do inmovilizado afecto á actividade, incluídos os dereitos reais sobre eles, cando os bens estean situados no ámbito xeográfico da Zona Especial Canaria.

c) As prestacións de servizos que se efectúen cos medios da entidade que estean situados no ámbito da Zona Especial Canaria. Para estes efectos, terán esta consideración as operacións con bens e servizos realizadas mediante o uso de tecnoloxías da información e as telecomunicacións, cos medios da entidade situados no ámbito da Zona Especial Canaria e na forma e cos requisitos que se determinen regulamentariamente.

d) As operacións realizadas desde os centros de actividade da entidade da Zona Especial Canaria situados no ámbito xeográfico da Zona Especial Canaria destinadas ás súas sucursais situadas fóra do dito ámbito xeográfico, cando estas fosen utilizadas pola sucursal para a entrega de bens ou a prestación de servizos a terceiros.

2. No numerador, con signo negativo, o valor das seguintes operacións:

a) As operacións recibidas polos centros de actividade da entidade da Zona Especial Canaria situados no ámbito xeográfico da Zona Especial Canaria desde as súas sucursais situadas fóra do dito ámbito xeográfico sempre que estas fosen utilizadas pola entidade da Zona Especial Canaria para a entrega de bens ou a prestación de servizos a terceiros.

b) As transmisións de elementos patrimoniais adquiridos pola entidade da Zona Especial Canaria procedentes de entidades que non teñan o carácter de entidade da Zona Especial Canaria como consecuencia de operacións acollidas ao réxime especial das fusións, escisións, achegas de activos, troca de valores e cambio de domicilio social dunha sociedade europea ou dunha sociedade cooperativa europea dun Estado membro a outro da Unión Europea previsto no capítulo VII do título VII da Lei 27/2014, do 27 de novembro, do imposto sobre sociedades.

3. No denominador incluírase o importe da totalidade dos ingresos e demais compoñentes positivos da base imponible da entidade da Zona Especial Canaria.

4. A porcentaxe resultante da aplicación dos criterios anteriores redondearase na unidade superior.

5. Para o cálculo da fracción anterior, as operacións referidas consignarase polo seu valor para efectos do imposto sobre sociedades, coa excepción das realizadas entre os centros de actividade da entidade da Zona Especial Canaria situados no ámbito xeográfico da Zona Especial Canaria e as súas sucursais situadas fóra do dito ámbito xeográfico, que se computarán conforme o seu valor normal de mercado determinado segundo se establece no artigo 18.4 da Lei 27/2014, do 27 de novembro, do imposto sobre sociedades.

Para os efectos do previsto neste artigo, entenderanse situados na Zona Especial Canaria:

a) As aeronaves que, polo seu destino, contribúan a mellorar as conexións das illas Canarias, nos termos que regulamentariamente se determinen.

b) Os buques con pavillón español e porto base en Canarias, incluídos os inscritos no Rexistro Especial de Buques e Empresas Navieiras.

c) As aplicacións informáticas e os dereitos de propiedade industrial, que non sexan simples signos distintivos do contribuínte ou dos seus produtos, e que se vaian aplicar exclusivamente en procesos produtivos ou actividades comerciais que se desenvolvan no ámbito territorial canario, así como os dereitos de propiedade intelectual que sexan obxecto de reprodución e distribución exclusivamente no arquipélago canario.

6. O tipo de gravame especial aplicarase exclusivamente á parte da base imponible que coincida coa menor das seguintes contías:

a) O importe que resulte de lle aplicar á base imponible a porcentaxe determinada no número 4.

b) O importe que resulte da aplicación das seguintes regras:

– 1.800.000 euros, para aquelas entidades da Zona Especial Canaria que cumbran o requisito de creación mínima de emprego previsto no artigo 31.2.e) desta lei.

– 500.000 euros adicionais por cada posto de traballo que exceda o mínimo sinalado, ata alcanzar 50 postos de traballo.

– A creación de postos de traballo por riba de 50, así como a aludida nas dúas regras anteriores, estará sometida, en todo caso, ao seguinte límite: a minoración da cota íntegra en cada período impositivo, tras a aplicación do tipo especial aplicable na Zona Especial Canaria, en relación co tipo xeral do imposto sobre sociedades non poderá ser superior ao 17,5 por cento do importe neto da cifra de negocios da entidade da Zona Especial Canaria, cando a entidade pertenza ao sector industrial, ou ao 10 por cento do dito importe, cando a entidade corresponda a un sector distinto do antes citado.

Para estes efectos, entenderanse comprendidas no sector industrial todas aquelas actividades incluídas nas divisións 1 a 4 da sección primeira das tarifas do imposto sobre actividades económicas, aprobadas polo Real decreto legislativo 1175/1990, do 28 de setembro, polo que se aproban as tarifas e a instrución do imposto sobre actividades económicas.

Para estes efectos, enténdese por creación neta de emprego o número de postos de traballo netos creados no ámbito xeográfico da Zona Especial Canaria desde a inscrición da entidade da Zona Especial Canaria, excluídas, de ser o caso, as incorporacións dun cadro de persoal anterior.

As variacións na creación neta de emprego producirán efecto no exercicio impositivo en que se produzan.»

Doce. Suprímense os artigos 48 e 49.

Trece. Modifícanse a alínea d) dos números 2 e 3 e o número 5 do artigo 50, que quedan redactados da seguinte maneira:

«d) A contía da taxa de inscrición será de 850 euros.»

«d) A contía da taxa anual de permanencia será de 1.500 euros. Para as entidades da Zona Especial Canaria establecidas en illa distinta de Tenerife e Gran Canaria, a dita contía será de 1.300 euros.

No caso previsto no parágrafo segundo da alínea c) anterior, a contía da taxa ratearase por trimestres naturais, excluído aquel en que se produza a cancelación da inscrición.»

«5. As taxas poderán ser obxecto de autoliquidación por parte do suxeito pasivo nas condicións descritas no artigo 52.3 do Regulamento de desenvolvemento da Lei 19/1994, do 6 de xullo, en materias referentes aos incentivos fiscais na imposición indirecta, á Reserva para Investimentos en Canarias e á Zona Especial Canaria, aprobado polo Real decreto 1758/2007, do 28 de decembro.»

Catorce. Modifícase o segundo parágrafo do artigo 52, que queda redactado da seguinte maneira:

«No caso do imposto sobre sociedades, esta perda producirá efectos no período impositivo en que o dito incumprimento se produza. Ademais, se o requisito incumprido for o recollido na alínea d) do número 2 do artigo 31 da presente lei, xunto coa cota diferencial do exercicio incluírase a diferenza entre a cota íntegra liquidada nos períodos impositivos finalizados con anterioridade e a que se tivese liquidado aplicando o tipo de gravame xeral á totalidade da base imponible, así como os correspondentes xuros de demora.»

Quince. Modifícase o artigo 63, que queda redactado da seguinte maneira:

«Artigo 63. *Entidades da Zona Especial Canaria que se dediquen á produción, manipulación, transformación ou comercialización de mercadorías no ámbito das zonas francas de Canarias.*

As entidades da Zona Especial Canaria que se dediquen á produción, manipulación, transformación ou comercialización de mercadorías e que se acollan, así mesmo, ao réxime das zonas francas establecidas nas illas Canarias, deberanse situar nas áreas xeográficas restrinxidas propias destas zonas.»

Dezaseis. Modifícase o artigo 66, que queda redactado da seguinte maneira:

«Artigo 66. *Tipificación das infraccións.*

1. As infraccións clasifícanse en graves e leves.

2. Son infraccións graves:

a) O desenvolvemento polas entidades da Zona Especial Canaria de actividades non incluídas na autorización prevista no artigo 40 desta lei.

b) O incumprimento dalgún dos requisitos contidos nas alíneas d), e) e f) do número 2 do artigo 31 desta lei, salvo causa de forza maior e sen prexuízo do disposto no último parágrafo da alínea d) do número 2 do dito artigo.

c) A inobservancia do deber de remisión de información exixible ao abeiro do artigo 38 desta lei, sempre que consten, polo menos, dous requirimentos expresos e por escrito do Consorcio da Zona Especial Canaria.

3. Son infraccións leves:

a) O incumprimento das instrucións sobre o funcionamento da Zona Especial Canaria que fosen ditadas polo Consorcio da Zona Especial Canaria.

b) O incumprimento de calquera obriga derivada desta lei e das súas normas de desenvolvemento, sempre que non se encontren tipificadas como infracción grave.»

Dezasete. Modifícase o segundo parágrafo do número 1 do artigo 67, que queda redactado da seguinte maneira:

«Non obstante o disposto no parágrafo anterior, a entidade sancionada poderá solicitar no seguinte exercicio o desfrute dos beneficios fiscais, nos termos que regulamentariamente se establezan, sempre que cumprise todos os requisitos previstos no número 2 do artigo 31 desta lei. En caso de que a entidade non presente esta solicitude, procederase á cancelación da inscrición da entidade infractora no Rexistro Oficial de Entidades da Zona Especial Canaria.»

Dezaioito. Engádese unha disposición adicional décimo terceira coa seguinte redacción:

«Disposición adicional décimo terceira. *Dedución por actividades de innovación tecnolóxica que se realicen en Canarias.*

A porcentaxe da dedución por actividades de innovación tecnolóxica que se realicen en Canarias e cumpran os criterios establecidos no número 2 do artigo 35 da Lei 27/2014, do 27 de novembro, do imposto sobre sociedades, será do 45 por cento, sen que lle resulte de aplicación o disposto no artigo 94.1.a) da Lei 20/1991, do 7 de xuño, de modificación dos aspectos fiscais do réxime económico fiscal de Canarias.»

Dezanove. Engádese unha disposición adicional décimo cuarta coa seguinte redacción:

«Disposición adicional décimo cuarta. *Límites das deducións por investimentos en producións cinematográficas, series audiovisuais e espectáculos en vivo de artes escénicas e musicais realizados en Canarias.*

O importe da dedución por investimentos en producións españolas de longametraxes cinematográficas e de series audiovisuais de ficción, animación ou documental a que se refire o número 1 do artigo 36 da Lei 27/2014, do 27 de novembro, do imposto sobre sociedades, non poderá ser superior a 5,4 millóns de euros cando se trate de producións realizadas en Canarias.

O importe da dedución por gastos realizados en territorio español por producións estranxeiras de longametraxes cinematográficas ou de obras audiovisuais a que se refire o número 2 do artigo 36 da Lei 27/2014 non poderá ser superior a 4,5 millóns de euros cando se trate de gastos realizados en Canarias.

O importe da dedución por gastos realizados na produción e exhibición de espectáculos en vivo de artes escénicas e musicais a que se refire o número 3 do artigo 36 da Lei 27/2014 non poderá ser superior a 900.000 euros cando se trate de gastos realizados en Canarias.»

Vinte. Modifícase a disposición transitoria cuarta, que queda redactada da seguinte maneira:

«Disposición transitoria cuarta. *Réxime de dedución por investimentos en Canarias.*

No suposto de supresión do réxime xeral de dedución por investimentos regulado pola Lei 61/1978, do 27 de decembro, do imposto sobre sociedades, a súa aplicación futura nas illas Canarias, mentres non se estableza un sistema substitutorio equivalente, continuarase realizando conforme a normativa vixente no momento da supresión.

Non obstante, as cantidades non deducidas poderanse aplicar, respectando os límites que lles resulten de aplicación, nas liquidacións dos períodos impositivos que conclúan nos 15 anos inmediatos e sucesivos.

O prazo previsto no punto anterior resultará igualmente de aplicación, respectando os referidos límites, ás deducións pendentes de aplicación no momento da entrada en vigor do Real decreto lei 15/2014, do 19 de decembro, de modificación do réxime económico e fiscal de Canarias.»

Vinte e un. Engádesse un anexo coa seguinte redacción:

«ANEXO

Lista de actividades económicas (segundo a clasificación NACE Rev.2)

- 01.28 Cultivo de plantas medicinais e farmacéuticas
- 03 Pesca e acuicultura.
- 10 Industria da alimentación.
- 11 Fabricación de bebidas.
- 12 Industria do tabaco.
- 13 Industria téxtil.
- 14 Confección de roupa de vestir.
- 15 Industria do coiro e do calzado.
- 16 Industria da madeira e da cortiza, excepto mobles; cestaría e espartaría.
- 17 Industria do papel.
- 18 Artes gráficas e reprodución de soportes gravados.
- 20 Industria química.
- 21 Fabricación de produtos farmacéuticos.
- 22 Fabricación de produtos de caucho e plásticos.
- 23 Fabricación doutros produtos minerais non metálicos.
- 25 Fabricación de produtos metálicos, excepto maquinaria e equipamento, salvo 25.4 Fabricación de armas e municións.
- 26 Fabricación de produtos informáticos, electrónicos e ópticos.
- 27 Fabricación de material e equipamento eléctrico.
- 28 Fabricación de maquinaria e equipamento n.c.o.p.
- 30.12 Construción de embarcacións de recreo e deporte.
- 30.3 Fabricación de vehículos aéreos de control remoto.
- 30.92 Fabricación de bicicletas e de vehículos para persoas con discapacidade.
- 31 Fabricación de mobles.
- 32 Outras industrias manufactureiras.
- 33 Reparación e instalación de maquinaria e equipamento.

- 35.1 Producción, transporte, distribución e comercialización de enerxía eléctrica a partir de fontes renovables.
- 36 Desalinización e desalgadura de auga a partir de enerxías renovables.
- 37 Recolla e tratamento de augas residuais.
- 38 Recolla, tratamento e eliminación de residuos; valorización.
- 39 Actividades de descontaminación e outros servizos de xestión de residuos.
- 41.20 Rehabilitación, reforma, remodelación ou renovación de edificios ou espazos. Montaxe «in situ» de construcións prefabricadas.
- 45 Venda e reparación de vehículos de motor e motocicletas, salvo venda retallista de vehículos de motor e motocicletas e de repostos e accesorios duns e doutras clasificados en 45.1, 45.32 e 45.4.
- 46 Comercio por xunto e intermediarios de comercio, excepto de vehículos de motor e motocicletas.
- 49 Transporte terrestre e por tubaxe.
- 50 Transporte marítimo e por vías navegables interiores.
- 51 Transporte aéreo.
- 52 Almacenamento e actividades anexas ao transporte.
- 53 Actividades postais e de correos.
- 58 Edición.
- 59 Actividades cinematográficas, de vídeo e de programas de televisión, gravación de son e edición musical, excepto 59.14 Actividades de exhibición cinematográfica.
- 61 Telecomunicacións.
- 62 Programación, consultoría e outras actividades relacionadas coa informática.
- 69 Actividades xurídicas e de contabilidade.
- 70 Actividades das sedes centrais; actividades de consultoría de xestión empresarial.
- 71 Servizos técnicos de arquitectura e enxeñaría; ensaios e análises técnicas.
- 72 Investigación e desenvolvemento.
- 73 Publicidade e estudos de mercado.
- 74 Outras actividades profesionais, científicas e técnicas.
- 77.4 Arrendamento da propiedade intelectual e produtos similares, excepto traballos protexidos polos dereitos de autor.
- 78 Actividades relacionadas co emprego.
- 79 Actividades de axencias de viaxes, operadores turísticos, servizos de reservas e actividades relacionadas.
- 80 Actividades de seguridade e investigación.
- 82 Actividades administrativas de oficina e outras actividades auxiliares ás empresas.
- 85.32 Educación secundaria técnica e profesional.
- 85.4 Educación postsecundaria.
- 85.5 Outra educación.
- 85.6 Actividades auxiliares á educación.
- 86.9 Outras actividades sanitarias.
- 87.1 Asistencia en establecementos residenciais con coidados sanitarios.
- 93.19 Centros de alto rendemento deportivo.
- 93.21 Actividades dos parques de atraccións e dos parques temáticos.
- 96.04 Actividades de mantemento físico.

Igualmente resultarán de aplicación aquelas actividades que, figurando na lista de actividades do anexo do Real decreto lei 2/2000, do 23 de xuño, polo que se modifica a Lei 19/1994, do 6 de xullo, de modificación do réxime económico e fiscal de Canarias, e doutras normas tributarias, non aparezan recollidas no anexo arriba reproducido, cando tal exclusión obedeza exclusivamente ao cambio de código

correspondente a tales actividades motivado pola substitución da clasificación NACE Rev.1.1 pola clasificación NACE Rev.2.

Naqueles supostos en que a denominación da actividade non coincida integramente coa do correspondente código NACE prevalecerá aquela.

Para cada unha das actividades 10, 11, 12, 13, 14, 15, 16, 17, 18, 20, 21, 22, 23, 25, 26, 27, 28, 30.12, 30.3, 30.92, 31 e 32, inclúense as actividades de alugamento ou aqueloutras que sexan desenvolvidas polos fabricantes para a posta en circulación da súa propia produción.

Os centros de coordinación e servizos intragrupo encóntranse excluídos das actividades comprendidas nas categorías 70.10 «Actividades das sedes centrais» ou 70.22 «Outras actividades de consultoría de xestión empresarial.»

Disposición adicional primeira. *Inaplicación dos beneficios fiscais cando concorran axudas de Estado ilegais e incompatibles.*

Non poderá desfrutar dos beneficios fiscais regulados na Lei 19/1994, do 6 de xullo, de modificación do réxime económico e fiscal de Canarias, nin na Lei 20/1991, do 7 de xuño, de modificación dos aspectos fiscais do réxime económico fiscal de Canarias, que constitúan axudas estatais segundo o ordenamento comunitario quen percibise axudas de Estado declaradas ilegais e incompatibles co mercado común ata que non se producise o reembolso correspondente de tales axudas.

Disposición adicional segunda. *Adecuación dos incentivos aplicables no marco do réxime económico e fiscal de Canarias ao ordenamento comunitario.*

1. A regulación e aplicación dos incentivos aplicables no marco do réxime económico e fiscal de Canarias axustarase ao establecido no ordenamento comunitario.

En particular, observarase o preceptuado no Regulamento (UE) nº 651/2014 da Comisión, do 17 de xuño de 2014, polo que se declaran determinadas categorías de axudas compatibles co mercado interior en aplicación dos artigos 107 e 108 do Tratado.

2. A aplicación dos beneficios fiscais que teñan a consideración de axudas rexionais ao funcionamento, establecidos no libro II e no artigo 94 da Lei 20/1991, na Lei, da Comunidade Autónoma de Canarias, 4/2014, do 26 de xuño, pola que se modifica a regulación do arbitrio sobre importacións e entregas de mercadorías nas illas Canarias, nos artigos 26 e 27 e no título V da Lei 19/1994, e na disposición adicional décimo segunda da Lei 43/1995, do 27 de decembro, do imposto sobre sociedades, así como as axudas ao transporte de mercadorías comprendidas no ámbito do Real decreto 362/2009, do 20 de marzo, sobre compensación ao transporte marítimo e aéreo de mercadorías non incluídas no anexo I do Tratado constitutivo da Comunidade Europea, con orixe ou destino nas illas Canarias, e da Orde do 31 de xullo de 2009, do conselleiro de Obras Públicas e Transportes do Goberno de Canarias, pola que se aproban as bases de vixencia indefinida para a concesión de subvencións ao transporte interinsular de mercadorías non incluídas no anexo I do Tratado constitutivo da Comunidade Europea, estarán suxeitas ao límite conxunto do 17,5 por cento do volume de negocios anual do beneficiario obtido nas illas Canarias, cando se trate dunha entidade pertencente ao sector industrial, ou do 10 por cento do dito volume de negocios, cando a entidade corresponda a calquera outro sector incluído no ámbito de aplicación do citado Regulamento nº 651/2014.

Para estes efectos, entenderanse comprendidas no sector industrial todas aquelas actividades incluídas nas divisións 1 a 4 da sección primeira das tarifas do imposto sobre actividades económicas, aprobadas polo Real decreto legislativo 1175/1990, do 28 de setembro, polo que se aproban as tarifas e a instrución do imposto sobre actividades económicas.

Disposición adicional terceira. *Axudas en relación co sector do tabaco.*

As axudas estatais en favor do sector do tabaco, no marco do réxime económico e fiscal de Canarias, serán de aplicación en iguais condicións que para o resto do sector industrial, salvo que se permita a aplicación dun limiar superior mediante a preceptiva autorización comunitaria.

Para estes efectos, entenderanse comprendidas no sector industrial todas aquelas actividades incluídas nas divisións 1 a 4 da sección primeira das tarifas do imposto sobre actividades económicas, aprobadas polo Real decreto legislativo 1175/1990, do 28 de setembro, polo que se aproban as tarifas e a instrución do imposto sobre actividades económicas.

Disposición adicional cuarta. *Control das axudas estatais.*

A acumulación das axudas obtidas en virtude de todos os incentivos aplicables no marco do réxime económico e fiscal de Canarias, así como daqueles outros, calquera que sexa a súa natureza, que teñan a consideración de axudas de Estado, será obxecto dun sistema de seguimento e control.

Para estes efectos, os beneficiarios deberán presentar unha declaración informativa relativa ás distintas medidas ou réximes de axudas utilizadas. Esta declaración incluírá información detallada dos aludidos incentivos, que serán obxecto de comprobación.

A superación dos límites de acumulación de axudas constituirá unha infracción, cuxa sanción consistirá nunha multa pecuniaria proporcional do 20 por cento do exceso.

O reintegro do exceso da axuda e a imposición da citada sanción efectuaranse conforme os procedementos correspondentes en función da natureza da axuda.

Tamén constituirá unha infracción a non presentación en prazo e a presentación de forma incompleta, inexacta ou con datos falsos da mencionada declaración informativa, así como a súa presentación por medios distintos aos electrónicos, informáticos e telemáticos naqueles supostos en que haxa obriga de facelo polos ditos medios.

A sanción consistirá nunha multa pecuniaria fixa de 20 euros por cada dato ou conxunto de datos que se deberían ter incluído na declaración, cun mínimo de 300 euros e un máximo de 20.000 euros.

Se a declaración se presenta fóra de prazo sen requirimento previo da Administración tributaria, ou se presenta por medios distintos aos electrónicos, informáticos e telemáticos naqueles supostos en que haxa obriga de facelo polos ditos medios, a sanción e os límites mínimo e máximo serán a metade dos previstos no parágrafo anterior.

Reglamentariamente, dítanse as normas necesarias para o desenvolvemento e a aplicación do establecido nesta disposición adicional e, en particular, as de atribución da competencia para a realización do control a que esta se refire.

Disposición transitoria única. *Reserva para Investimentos en Canarias.*

1. As dotacións á Reserva para Investimentos procedentes de beneficios de períodos impositivos iniciados antes do 1 de xaneiro de 2015 regularanse polas disposicións establecidas no artigo 27 da Lei 19/1994, do 6 de xullo, de modificación do réxime económico e fiscal de Canarias, segundo a redacción vixente en 31 de decembro de 2014.

2. Os investimentos anticipados realizados nun período impositivo iniciado antes do 1 de xaneiro de 2015 consideraranse materialización da Reserva para Investimentos de beneficios obtidos noutro período impositivo posterior iniciado igualmente antes da dita data, e regularanse polas disposicións establecidas no artigo 27 da Lei 19/1994, segundo a redacción vixente en 31 de decembro de 2014.

3. Para os efectos do previsto no número 2 do artigo 27 da Lei 19/1994, non terá a consideración de beneficio non distribuído o correspondente ás rendas que se beneficiasen da dedución establecida no artigo 42 do texto refundido da Lei do imposto sobre sociedades, aprobado polo Real decreto legislativo 4/2004, do 5 de marzo.

Disposición derradeira primeira. *Modificación da Lei 24/2013, do 26 de decembro, do sector eléctrico.*

Modifícase a disposición transitoria décimo segunda da Lei 24/2013, do 26 de decembro, do sector eléctrico, que queda redactada da seguinte maneira:

«Disposición transitoria décimo segunda. *Mecanismo de outorgamento de réxime retributivo específico para instalacións renovables nos sistemas eléctricos non peninsulares.*

Con carácter extraordinario e ata o 31 de decembro de 2015, o Goberno poderá exceptuar a aplicación do procedemento de concorrencia competitiva previsto no artigo 14.7.a) e c) de outorgamento de réxime retributivo específico para determinadas tecnoloxías de xeración renovable nos sistemas eléctricos non peninsulares, cando a súa introdución supoña unha redución significativa dos custos de xeración do sistema eléctrico e sempre que a súa posta en servizo se produza con anterioridade ao 31 de decembro de 2018.»

Disposición derradeira segunda. *Título competencial.*

Este real decreto lei apróbase ao abeiro do disposto no artigo 149.1.14ª da Constitución, que lle atribúe ao Estado a competencia en materia de facenda xeral.

Disposición derradeira terceira. *Desenvolvemento regulamentario.*

Habílitase o Goberno para que, no ámbito das súas competencias, dite as disposicións regulamentarias necesarias para o desenvolvemento e aplicación deste real decreto lei.

Disposición derradeira cuarta. *Entrada en vigor.*

Este real decreto lei entrará en vigor o 1 de xaneiro de 2015.

Dado en Madrid o 19 de decembro de 2014.

FELIPE R.

O presidente do Goberno,
MARIANO RAJOY BREY.